

## XVI. IGANDEA URTEAN ZEHAR (A)

### Otoitza

Begira, Jauna, zeure zerbitzariei  
eta emazkiezu ugari zeure graziaren dohainak,  
fedea, esperantzak eta maitasunak indarturik,  
zure aginduetan erne iraun dezaten.  
Zure Seme Jesu Kristo.

I. IRAKURGAIA: Jak 12, 13. 16-19

*Bekatuen ondoren damu bidea ematen duzu.*

Jakinduriaren liburutik

Ez da Zu beste jainkorik;  
gauza guztien ardura duzu,  
horrela erakusteko, ez duzula zuzengabe epaitzen.  
Zure indarra zuzentasunaren hasiera da,  
eta guztien Jaun izateak  
guztien barkatzaile egiten zaitu.  
Guztiz ahaltu zarela sinesten ez duenari,  
zure indarra agertzen diozu;  
eta zapaltzen duzu  
indar horren berri ez dutenen ausardia.  
Zuk, agintari guztiz ahaltu Horrek,  
neurritz epaitzen duzu,  
eta begirapen handiz erabiltzen gaituzu,  
nahi duzun guztia egin baitezakezu.  
Horrela eginez erakutsi diozu zure herriari,  
gizon zuzenak bihotz oneko izan behar duela,  
eta zure semeei itxaropen ona eman diezu,  
bekatuen ondoren damu bidea ematen duzula.

ERANTZUN SALMOA: Sal 85, 5-6. 9-10. 15-16a

**R/. Ona zara, Jauna, eta kupibera.**

Ona baitzara, Jauna, eta kupibera,  
deitzen zaituzten guztientzat onginahiz betea.  
Entzun, Jauna, nire otoitza,  
adi nire eskariaren hotsa. R/.

Egin dituzun atzerri guztiak  
etorriko dira, Jauna, Zu jaurestera,  
eta zure izena ospatzera.  
«Handia zara, eta mirarigile,  
Zu bakarrik zara Jainko.» R/.

Zu, ordea, Jauna, Jainko errukior zaitut, eta onbera,  
berant-haserre, guztiz maitekor eta leiala.  
Begira iezadazu eta erruki zakizkit. R/.

II. IRAKURGAIA: Erm 8, 26-27

*Espirituak eskatzen du gure alde,  
esan ezin halako intziriz.*

San Paulo Apostoluak Erromatarrei

Senideok: Espiritua datorkigu geure ahuleriaren lagun, guk ez baitakigu zer eta nola eskatu; Espirituak berak eskatzen du, ordea, gure alde, esan ezin halako intziriz. Eta bihotzak aztertzen dituenak ezagutzen du zer den Espirituaren gogoia, eta Espirituak Jaungoikoaren asmoen erara eskatzen duela, zintzoen alde.

EBANJELIOA: Mt 13, 24-43

**Aleluia:** Ik. Mt 11, 25

R/. Aleluia.

V/. Bedeinkatua Zu, Aita, zeru-lurren Jauna,  
zure erreinuko misterioak  
jende xumeari erakutsi baitizkiozu. R/.

Irakurgai laburragoa egin nahi bada, [ ] kako artean ematen den zatia utz daiteke.

*Utzi biak batera hazten uzta arte.*

Jesu Kristoren Ebanjelioa San Mateoren liburutik

Aldi hartan, Jesusek parabola hau esan zion jendeari: «Zeruetako erreinua, bere soroan hazi ona erein zuen gizonaren antzekoa da. Mutilak lo zeudelarik, etorri zen etsaia, eta gari artean iraka erein eta hala aldegin zuen.

Garia ernetzen eta burutzen hasi zeneko, han azaldu zen iraka ere. Etxeko mutilak joan zitzaizkion nagusiari, eta esan zioten: «Jauna, ez ahal zenuen hazi ona erein soroan? Nondik dator, bada, iraka?» Nagusiak erantzun zien: «Etsairen batek egin du hori». Mutilek orduan: «Nahi al duzu, biltzera gu joatea?» Eta nagusiak: «Ez! Iraka biltzen hasita, bai bailiteke irakarekin bateran garia ere ateratzea. Utzi biak batera hazten uzta arte; eta uzta garaian esango diet igitariei: "Bil ezazue lehendabizi iraka, eta lotu balatan erretzeko; garia, berriz, pila ezazue nire galtegian"».

[ Beste parabola hau esan zion jendeari: «Zeruetako erreinua, gizon batek bere soroan ereiten duen mostaza haziaren antzekoa da. Hazi guztietan tkikiena da; baina hazten denean, beste barazki guztiak baino landare handiagoa gertatzen da, eta zuhaitz egiten; etortzen dira txoriak, eta haren adarretan egiten dute habia».

Beste parabola bat esan zien: «Zeruetako erreinua orantzaren antzekoa da; emakume batek hartu, eta hiru lakari irinetan sartzan du, eta orantzak ore guztia harrotzen du».

Guzti hauek parabolatan esaten zizkion jendeari; eta parabolarik gabe ez zien hitzegiten, profetak esana bete zedin: «Parabolatan zabalduko dit nire ahoa; eta lurra lur de...

agertuko ditut».

Orduan Jesus, jendea utzirik, etxera joan zen. Ikasleak hurbildu zitzaizkion, esanez: «Argi iezaguzu soroko irakaren parabola».

Jesusek erantzun zien: «Hazi ona ereiten duena Gizonaren Semea da; soroa, mundua; hazi ona, erreinuko semeak dira; iraka, berriz, Gaiztoaren umeak; erein duen etsaia, deabrua da; uzta, munduaren azkena; eta uzta biltzaileak, aingeruak.

Beraz, iraka bildu eta sutan erretzen den bezala, hala izango da munduaren azkenean. Gizonaren Semeak bidaliko ditu bere aingeruak, eta hauek bilduko dituzte, Haren erreinutik, erorbide izan diren guztiak eta gaizkile guztiak. Eta su labera botako dituzte; han izango da negarra eta hortz-karraska! Orduan zintzoek eguzkiak bezala argi egingo dute, beren Aitaren erreinuan. Belarririk duenak, entzun dezala».

### **Oparigaien gainekoa**

Jainko Jauna, Itun Zaharreko opari guztiak  
beren betera ekarri dituzu gurutzeko opari bakarrean;  
onar ezazu eta santu egin  
zeure zerbitzarion eskaintza,  
Abelena bedeinkatu zenuen bezala;  
eta bakoitzak Zu goresteke eskaintzen duena  
guztien salbamenerako izan dadila.  
Jesu Kristo.

### **Jaunartze ondorengoa**

Zaude beti, Jauna, zeure herriarekin;  
eta sakramentu hauen graziaz bete dituzunei  
emaiezu, beren izate zaharra utzirik,  
jainkozko bizi berriaren erara bizitzea.  
Jesu Kristo.